

Aatsitassarsioqatigiit aatsitassanik misissuiniarneranni aammalu misissuinerit suli Ingerlagallarneranni innuttaasunik oqimaaqatigiisumik paasissutissiisoqartarnissaa siunertaralugu, apeqquteqaat tunngavigalugu Inatsisartut oqallinnissaannik siunnersuut.

(Inatsisartunut ilaasortaq Kalistat Lund, Inuit Ataqtigiit)

Akissuteqaat

(Inuussutissarsiornermut, Suliffeqarnermut Niuernermullu Naalakkersuisoq)

Aatsitassarsiornermik suliassanut atatillugu innuttaasut aatsitassarsiorfiutileqatigiiffinnit oqimaaqatigiisumik paasissutissinneqartarnissaat qanoq qulakkeerneqarsinnaanersoq oqallisiginissaanut periarfissinneqaramik Naalakkersuisut qujapput.

Aallarniutigalugu oqaatigissavara, aatsitassarsiornermik suliassanut isummersuutit oqariartuutaasullu, ilanngullugit innuttaasut ingerlatseqatigiiffiillu isummersuutaat, killilersuinertaqanngitsumik killiliinertaqanngitsumillu ingerlateqqinneqarsinnaanissaat Naalakkersuisut sulissutigimmassuk.

VSB-mut nalunaarusiaq, tassalu Inuiaqatigiinni piujuartussamik iluaqutaasumik sunniutaasussanut nalunaarusiaq, inatsisitigut piumasaqaataasoq, suliassap akuersissuteqarfigineqarnissaa sioqqullugu suliarineqartussa qanoq avatangiisinut VVM-mut nalunaarusiamut peqatigitillugu tusarniaanermut allakkiaatut atorpeqartartoq, inuiaqatigiit aningaasaqarneranni aamma avatangiisini ajornartorsiutit qanoq iliuuseqarfiginiarnerlugit ingerlatseqatigiiffimmit innersuussutaavoq. Tusarniaanermut siunertaasoq tassarpiaavoq soqutigisaqartut suliassanut pilersaarutinut taakkununga namminneerlutik ilanngussassaminnik, siunnersuutiminnik, akerliliiniarlutik siunnersuutiminnik aammalu allatigut oqaaseqaatiminnik saqqummiussisinnaanissaat.

VSB-mut aamma VVM-mut nalunaarusianut atugassanik ingerlatseqatigiiffiit misissuinerisa ingerlaneranni paasisaqarnissamut sunniinissamullu periarfissat annertuumik annertusineqarput. 2014-mi upernaakkut ataatsimiinnermi aatsitassanut ikummatissanullu inatsimmi kapitali nutaaq tusarniaaqaarnermut aamma tusarniaanermut tunngasoq akuerineqarpoq. Taamaalilluni VSB-ip suliarineqarnera aamma VVM-ip suliarineqarnera pillugu suliassanut nassuiaat ulluni 35-ini tamanut ammasumik tusarniaaqaassutigineqartussaavoq. Taamaalillutik innuttaasut, kingusinnerusukkut sapaatit

akunnerini arfineq pingasuni tusarniaanissap pinnginnerani, VSB-imik aamma VVM-imik suliaqarnermi allanik ilanngunneqartariaqartunik siunnersuuteqarnissamut periarfissaqarput.

2014-imi upernaakkut ataatsimiinnermi taamatuttaaq aatsitassanut ikummatissanullu inatsimmut tapiliussaq akuerineqarpoq. Tassani allassimavoq aningaasaateqarfimmik pilersitsisoqassasoq, tassunga innuttaasut, nunaqqatigiit imaluunniit kattuffiit attuumassuteqartut, assersuutigalugu tusarniaanermut akissuteqaammik suliaqarnermut immikkut ilisimasalinnik ikiortissarsiornissamut imaluunniit aatsitassarsiornermik suliassat aalajangersimasut pillugit arlaannaannulluunniit attuumassuteqanngitsumik misissuisitsinissamut, aningaasanik qinnuteqarsinnaallutik. Aningaasaateqarfiup aqunneqarnera Naalakkersuisut Siulittaasuata Naalakkersuisoqarfiani isumagineqarpoq. Piffissamit aatsitassarsiornermut suliassamut tunngatillugu suliassamut nassuiaatip tusarniaaqaassutigalugu nassiuunneqarneranit aningaasanik qinnuteqarnissamut periarfissaqarpoq. Inatsimmik allannguuteqartitsinermit tassani siunertaavoq, aatsitassarsiornermut suliassamut tunngatillugu piukkunnaatilimmik arlaannaannulluunniit attuumassuteqanngitsumik isornartorsiuiffiusumik oqallinnissamik siuarsaanissaq. Taamaattumik aningaasanut inatsimmi kontomik pingaarnermik nutaamik pilersitsisoqarpoq suliffissuaqarnermut pilersaarutinut annernut atatillugu arlaannaannulluunniit attuumassuteqanngitsumik paasiniaasussanut tapersiinissamut aningaasaliissutinik imaqartumik. Siunertamut 1 mio. koruunit immikkoortinneqarput.

Tassunga nangissutigalugu inuiaqatigiinni piujuartussamik iluaqutaasumik sunniutaasussanik nalilersuinermit ilitsersuut nutartigaq suliarineqaleruttorpoq. Ilitsersuummi tassani aatsitassarsiorniutiqatigiiffiit innuttaasut akuutinneqarnissaannik aammalu paasissutissiisarnermik suli annertunerusumik aallussinissaat, inassutigineqarpoq. Taamaattumik ingerlatseqatigiiffiit tusarniaanermut najoqqutassanik, amerlanertigut VSB-imut aamma VVM-imut nalunaarusiat inatsisitigut piumasqaataasut, suliaqartussanngornermini, aatsitassanut suliassaqarfimmi naleqquttumik piujuartitsiviusussamillu ineriartortitsinissamut suliap ingerlanera tunngavissarititaasullu, siusinnerusumut naleqqiullugu ullumikkut samminerusarpaat.

Tamatuma saniatigut ilaatigut aatsitassarsiorniluni misissuinissamut piiaanissamullu akuersissutit pillugit Naalakkersuisut aalajangiisarnissaat pillugu pingaarutilimmik aatsitassanut ikummatissanullu inatsit imaqarpoq. Tamanna tusarniaanernit immersuinerit aamma assersuutigalugu Danmarkimi Nationalt Center for Miljø og Energi DCE-imit arlaannaannulluunniit attuumassuteqanngitsumik ilisimatusarnernit immersuinerit kingorna pivoq. Taamaalillutik annertuumik oqartussaasut sularinninnerat tunngavigalugu Naalakkersuisut aalajangiisarput, tamanna suliassap iluaqutissartaannik ajoqutissartaannillu oqimaqatigiissitsisumik nalilersuinermit iluaqutaasarpoq.

Matuma siuliani allassimasut aallaavigalugit Naalakkersuisut isumaqarput, aatsitassarsiorluni suliassani misissuinerlut naleqqiullugu oqimaaqatigiissumik paasissutissiisarnernup qulakkeerqarnissaanut inatsisip tunngaviusup iluani annertuunik suliniuteqareersoq. Innuttaasunut attaveqaqateqarnermut aammalu paasissutissiisarnernut tunngatillugu suleriaaseq pitsaanerpaaq sulineruvoq ingerlaavartoq. Taamaattumik aamma tamanna naleqquttutut isigineqassappat suliniutinik arlalinnik aallartitsisoqarsinnaanissaa mattunniangilara.

Tusarniaalluni ataatsimiititsinerit sapaatit akunnerini arfineq pingasuni tamanut ammasumik tusarniaanerup ingerlanerani ingerlanneqartartut pisortanit aaqqissuunneqartarput. Ingerlatseqatigiiffik, Namminersorlutik Oqartussat, kommuni aamma siunnersortit arlallit ataatsimiititsinerit taakkunani peqataagajuttarput. Tamanut ammasumik tusarniaalluni ataatsimiititsinerit, ingerlatseqatigiiffiup saqqummiussinerat, arlaannaannulluunniit atuumassuteqanngitsut immikkut ilisimasallit saqqummiussinerat, kiisalu tusarnaartunit apeqqutit oqaaseqaatillu akuliutsillugit amerlanertigut ingerlanneqartarput.

Tamatuma saniatigut namminneq aaqqissuussaminik ataatsimiititsinerimik nammineerluni ingerlatsiniarluni ingerlatseqatigiiffiup toqqarsinnaavaa. Ingerlatseqatigiiffiup nammineerluni paasissutissiilluni ataatsimiititsinerit aammalu ataatsimit-ataatsimut ataatsimiinnerit ataatsimiinnermut aqutsisumit imaluunniit arlaannaannulluunniit atuumassuteqanngitsumit aqunneqassanersut, Naalakkersuisut akuliuffiginiangilaat. Paasissutissiilluni ataatsimiititsinerit ingerlatseqatigiiffiup nammineerluni ataatsimiititsinerat isigineqarsinnaapput, tassani soqutigisaqartut allallu soqutiginnittut ingerlatseqatigiiffiup pilersaarutai tusagaqarfiginiarlugit takkussinnaallutik. Ataatsimiititseriaatsit marluk taakkua namminersortut ingerlataat aamma pisortat ingerlataat immikkoortissallugit pingaaruteqarpoq.

Klubbinut aningaasaliisarnernut tunngatillugu, tamanna suliffeqarfiit, tuniniaanissamik nittarsaassinerlut atatillugu atuisartuusut, akornanni nalinginnaasumik ilisimaneqarpoq. Tamanna aatsitassarsiornermut suliassaqaqarfiup iluani takornartaanngilaq. Ingerlatseqatigiiffiit qanoq suliaqarnerminnik nittarsaassisarnissamik kissaateqarnerannut imaluunniit CSR-mik ingerlatsinerannut oqartussaasut akuersissuteqartassappata, tamanna kiffaanngissuseqartumik oqaaseqarsinnaatitaanernut innarliisinnaavoq.

Naggataatigut oqaatigiinnassavara, nunani allani qanoq iliortoqartarnera Kalaallit Nunaanni isornartoqartitsinata ilaaginnartassanngikkipput isumaqatigilluinnarakku. Misilittakkat atorsinnaasorisavut atussavagut, tamatumalu kingorna taakkua Kalaallit Nunaanni pissutsinut naleqqussartassallugit.

Taamatut oqaaseqarlunga oqallilluarnissamik kissaappassi.